

Mellembølgikkut nassitsissutip atorunnaarsinneqarsimasup 2013-ip ingerlanerani taartigisinnaasaannik periarfissiisoqaqqinnissaa anguniarlugu Naalakkersuisut suliniuteqaqqullugit Inatsisartut aalajangiiffigisassaattut siunnersuut (Saqqummiussisoq: Inatsisartunut ilaasortaq Debora Kleist, Inuit Ataqatigiit)

pillugu

Sanaartornermut Avatangiisinullu ataatsimiititaliap

ISUMALIUTISSIISSUTAA.

Siunnersuutip aappassaaneerneqarnerani saqqummiunneqartoq.

Ataatsimiititaliap suliarinninnerani ilaasortat uku peqataapput:

Inatsisartunut ilaasortaq Naaja Nathanielsen, Inuit Ataqatigiit, Siulittaasoq
Inatsisartunut ilaasortaq Justus Hansen, Demokraterne, Siulittaasup tullia
Inatsisartunut ilaasortaq Storm Ludvigsen, Inuit Ataqatigiit
Inatsisartunut ilaasortaq Knud Fleischer, Kattusseqatigiit Partiiat
Inatsisartunut ilaasortaq Malik Berthelsen, Siumut
Inatsisartunut ilaasortaq Anders Olsen, Siumut
Inatsisartunut ilaasortaq Kim Kielsen, Siumut

Ulloq 25. april 2012 UPA 2012-mi siullermeerneqarnerata kingorna Ataatsimiititaliap siunnersuut misissorpaa.

Siunnersuutip imaa aamma siunertaa

Siunnersuutip siunertaraa mellembølgikkut nassitsissutip 2011-mi atorunnaarsinneqartup taartissaanik pilersitsinissaq. Siunnersuuteqartup siunnersuuteqarnermigut kissaatigaa, innutaasut illoqarfiit aamma nunaqarfiit avataaniittut KNR-radiomik tusarnaarnissamut periarfissaqaqqilernissaat.

Siunnersuutip Inatsisartuni siullermeerneqarnera

Siunnersuut partiinit ataatsimut isigalugu siamasissumik tapersersorneqarpoq, innuttaasullu KNR-radiomik tusarnaarsinnaangikkaangamik maqaasisaqarnerat partiinit tamanit paasineqarsinnaavoq. Tamatumunnga atatillugu siullermeerneqarnerani oqaatigineqartut Ataatsimiititaliap innersuussutigai.

Apeqquitiit

Mellembølgemik nassitsissutit matuneqarnissaat pillugit Naalakkersuisut isumaliutigisaannut tunngatillugu akissut una ataatsimiititaliamit ulloq 27. april 2012-imi tiguneqarpoq:

“Mellembølgemik nassitsissutip februar 2011-imi matuneqarneranut atatillugu Naalakkersuisut isumaliutersuutaat pingaarnersiunerillu pillugit sukumiinerusumik nassuiaammik Ataatsimiititaliaq kissaateqarpoq. Matusinermut atatillugu taartaasinnaasumik assersuutigalugu kortbølgemik nassitsissummik pilersitsisoqannginneranut isumaliuutit suut pissutaappat, aamma matusinermik inuit qassit KNR-radiop tusarsinnaajunnaarneratigut sunnigaasimappat?

Mellembølgekkut nassitsissutit atortut 1980-meersuummata – taamaalillutillu ukiunik 30-erpianik pisoqaassuseqarmata – atorunnaarsinneqarput. Taamaattumik ukiuni aggersuni aserfallatsaaliuinissaq pisariaqartinneqaleriartuinnartussaagaluarpoq. Tassunga ilanngullugu atortunut taamaattunut kingoraartissat tunisassiarineqarunnaarsimapput. Tamatuma kingunerisaanik KNR-radio mellembølgekkut nassitsisaannassappat tamanna nassitsissutinut nutaanut annertoorujussuarmik aningaasaliisoqarnissaa pisariaqartitsiviusussaassagaluarpoq.

Taarsiunneqarsinnaasooq tassaassagaluarpoq korbølgemut atortunik pilersitsinissaq, tamannalu 2007-imi naliliineq malillugu atortunut aningaasartuutinut 6 mio. koruuninik akeqartussaavoq, tassunga ukiumut ingerlatsinermut aningaasartuutit 500.000 koruunit ilanngunneqassallutik.

Illoqarfinnut nunaqarfinnullu FM-ikkut nassitsissutit atorlugit KNR-radio aamma aallakaatinneqartareermat, taamanikkut Naalakkersuisuisut naliliipput taamatut aningaasaliinissaq inuiaqatigiit aningaasaqarnerat eqqarsaatigalugu illersorneqarsinnaanngitsoq, taamaattumillu aalajangiisoqarpoq nassitsissutit atorunnaarsinneqassasut. FM-ikkut nassitsissutit atorlugit siammarterinerup saniatigut nunaatilinnut nalunaarsorsimasunut immikkut aaqqiissutissat pilersinneqarput, nunaateqarfinni taakkunani innuttaasut angerlarsimaffimmini radiukkut TV-ikkullu aallakaatitanik tiguisinnaanngortitsisunik.

Taamaalillutik Naalakkersuisut nunami innuttaasut amerlanerpaartaasa angerlarsimaffimminniinnermini radiukkut aallakaatitanik tiguisinnaanissaat qulakkeerpaat. Innuttaasut maqaasisinnaanerat pinngortitamiinnermini pisinnaavoq, assersuutigalugu aallaaniartillutik imaluunniit imaatigut angalaartillutik. Taamaattorli innuttaasut matusinermi eqqorneqartut amerlassusaat eqqoqqissaartumik missiliorneqarsinnaanngilaq.

Innuttaasut isumannaassuusaannut tunngatillugu, tassunga atatillugu erseqqissassallugu pingaaruteqarpoq mellembølge-kkut nassitsissutit matuneqarnerat imaani ajornartorsiortunut isumannaallisaanikkullu kifartuussissutinut sunniuteqartussaanngimmat,

taakkua periaatsit immikkoortut aqutugalugit atuutsinneqarmata. Tassunga ilanngunneqassaaq mellembølgekkut nassitsissutit matuneqarneranni VHF-ikkut ullormut sisamariarluni silassap tusarnaarsinnaanera ajornarunnaarsinneqarmat.

Taamaattoq Naalackersuisut ilisimavaat amerlasuut pinngortitamiinnerminni KNR-radiukkut aallakaatitanik tusarnaarsinnaannginneq maqaasigaat, taamaattumillu Upernaakkut ataatsimiinnermi imm. 55-ip suliarineqarnissaa qilanaaralugu.”

Ataatsimiititaliap siunnersuummik suliaqarnera

Aallaqqaasiullugu Ataatsimiititaliap paasivaa, mellembølgekkut nassitsissutit matuneqarnera imarsiornikkut ajunaalernerminni isumannaallisaanermilu sullissinermut sunniuteqanngitsaq, sullississutit taakku atortut allat atorlugit ingerlanneqarmata.

Ataatsimiititaliap maluginiarsimavaa, mellembølgekkut nassitsissutit matuneqarnerat nutateriniarluni suliniuteqarnermut ilaasoq, tassuunakkullu nuna tamakkerlugu nassitsissutit nutarternissaat isumannaarneqassasoq. Innuttaasut tamatumunnga atatillugu ilaatigut TV-kkut kanalinik arlalinnik periarfissaqalernikuupput, taamaalillunilu ilaatigut Inatsisartuni oqallinnerit toqqaannartumik malinnaaffigisinnaanerannik periarfissaqalerlutik. KNR-radio-p aallakaatitaanut atatillugu Naalackersuisut akissutaanni takuneqarsinnaavoq, taakku illoqarfinnut nunaqarfinnullu FM-ikkut nassitsissut atorlugu aallakaatinneqartartut, savaatilinnullu nalunaarsorneqarsimasunut immikkut ittumik aaqiisoqarsimasoq, taamaalilluni savaateqarfinni najugaqartut angerlarsimaffimminni radio aamma TV tusarnaarsinnaalerlugulu takusinnaalermassuk. Ataatsimiititaliap taamaalilluni paasisinnaavaa, TV-kkut radiokkullu aallakaatitat tusarnaarsinnaanerinit takusinnaanerinnullu, pitsaassutsikkullu nutarterinernik assigiinngitsunik suliniuteqartoqarsimasoq.

Taamaattorli innuttaasut arlallit KNR-radio-p tusarnaarnissaanik periarfissaarunniukuugamik pinngortitami piniariarnerminni imaatigullu angalanerminni suli maqaasisariaqarpaat. Silassamut nalunaarutinut tunngatillugu VHF atorlugu ullormut sisamariarluni aallakaatitsisoqartarpoq. Kisiannili sumiiffinni tamani, soorlu kangerlunni, VHF-imik attaveqartoqarsinnaanngilaq.

Taamaattumik mellembølgekkut nassitsissutinut taartaasinnaasumik nassaarnissaq pisariaqartoq Ataatsimiititaliap siunnersuuteqartoq isumaqatigaa. Ataatsimiititaliap maluginiarsimavaa, mellembølgekkut nassitsissutit pilerseqqinneqarnissaat ajornakusuussasoq akisussasorlu, taakkumi 1980-imeersuummata, annertunerujartortumillu aserfallatsaaliinermik pisariaqartitsillutik, peqatigisaanillu kingoraartissat sananeqassaarlutik.

Mellembølgekkut nassitsissutinut matuneqareersunut periarfissaq taartaasinnaasoq tassaasinnaavoq kortbølgekkut nassitsissummik pilersitsinissaq. Taamaattorli Naalackersuisut

akissuteqaatiminni taavaat, sumiiffiit ilaanni kortbølgekkut nassitsissutini, ilaatigut silaannaap pissusai, soorlu seqernup milai peqqutaallutik, attaveeruteqattaartoqarsinnaammat.

Naalakkersuisut akissuteqaatiminni Ataatsimiititaliaq allannguutissatut siunnersuummik saqqummiusseqqullugu kaammattorpaa, imaattumik "illoqarfiit nunaqarfiillu avataanni KNR raatiup tusarnaarneqartarnissaanut periarfissanik tamaginnik misissuinissamik Naalakkersuisut peqquneqarnissaat kiisalu allatut aningaasalersuinissamut periarfissanik qulaajaanissaannik kaammattorneqarnissaat pillugu allannguutissatut siunnersuummik saqqummiussisinnaaniassammat."

Naalakkersuisunit taaneqartutuulli Ataatsimiititaliaq isumaqarpoq, mellembølgekkut nassitsissutitut atorunnaartunut taartaasinnaasutut periarfissanik assigiinngitsunik, aamma periarfissani iluaqutaasut ajoqutaasullu tamarmik ersersinneqarnissaannut misissuinissaq pisariaqartoq. Aammattaaq Ataatsimiititaliap isumaqatigaa miliuunilikkaanik annertussusilimmik aningaasaliisoqartinnagu, taartaasinnaasup qanoq aningaasalersorneqarnissaa, aamma taassuma pilersinneqarneranut ingerlanneqarneranullu kina isumaginnittuussanersoq qulaajarneqartariaqartoq.

Suliarinninnermut atatillugu mellembølgekkut nassitsissutit matuneqaneranni qassit eqqugaasimanersut Ataatsimiititaliap aamma isummersorfigisimavaa. Ineqarnermut, Attaveqarnermut Angallannermullu Naalakkersuisoq akissuteqaatimini 27. april 2012-imeersumi ilisimatitsivoq, *"Taamaattorli innuttaasut matusinnermit eqqorneqartut amerlassusaat eqqoqqissaartumik missiliorneqarsinnaanngilaq."*

Tamatumunnga atatillugu Ataatsimiititaliap oqaatigissavaa, nassitsissummik pilersitsinissamut innuttaasut qassit pisariaqartitsivinnermut nalilerneqartariaqartoq, taamaalilluni nassitsissutip pilersinneqarnissaa isummerfigineqalernat Inatsisartut pitsaassuseqarluartumik aalajangiinissamut tunngavissaqassammata. Taamaattumik Ataatsimiititaliap Naalakkersuisut kaammattussavai, innuttaasut qassit mellembølgekkut nassitsissutip taartissaanik nassitsissummik allamik pisariaqartitsinersut misissuinnerminni aamma ersarissassagaat.

Ataatsimiititaliaq isumaqarpoq, misissuineq taamaattoq kingusinnerpaamik UKA 2012-imut pissarsiarineqarsinnaasariaqartoq.

Siunnersuutip aningaasatigut kingunissai

Siunnersuuteqartup aalajangiiffigisassatut siunnersuutimini taavaa, Tele Greenland-ip 2007-imi nalilersimagaa, kortbølgekkut nassitsissut pilersinneqarnerani 6 mio. kr.-inik akeqassasoq, ukiumullu ingerlatsinnermut aningaasartuutit 500.000 kr.-iussasut. Aningaasartuutiviusussanut soorunami apeqqutaassaaq mellembølgekkut nassitsissummut taartissaq suussanersoq aamma taanna qanoq aningaasalersorneqassanersoq Naalakkersuisut nassuiaaminni tikkuarpassuk.

Ataatsimiititaliap inassutaa:

Ataatsimiititaliap isumaqatigiittup siuliani taaneqartut tunuliaqutaralugit allannguutissatut siunnersuut una saqqummiutissavaat:

Nunap ilaani ullumikkut radiokkut anguneqarsinnaanngitsunut innuttaasut KNR-ip aallakaatitaanik tusarnaarnissamut periarfissaannik isumannaarunniarlugit, mellembølgekkut nassitsissummut atorunnaartumut taartissatut nassitsissummik allamik pilersitsinissamut periarfissanik qulaajaanissamut allaaserisaqarnissamullu Naalakkersuisut suliniuteqaqqullugit Inatsisartut aalajangiiffigisassaattut siunnersuut. Peqatigitillugu periarfissat taaneqartut aningaasatigut kingunerisassai allaaserisami erseqqissarneqassapput, tamakkulu qanoq aningaalersorneqarsinnaanerat nalilersorneqassalluni. Misissuinermit inerniliussat nassuiaatitut Inatsisartunut nassiunneqassapput, taannalu kingusinnerpaamik UKA 2012-p ingerlanerani agguanneqassaaq.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.

Naaja Nathanielsen,
Siulittaasoq

11. maj 2012

UPA 2012/55

Kim Kielsen

Justus Hansen

Malik Berthelsen

Storm Ludvigsen

Anders Olsen

Knud Fleischer